

牧

津

牧津卷之三目

消弭上

龔遂

賈琮

种暉

伏湛

祭彤

田豫

裴潛

鄭渾

鄧艾

沈璞

馮道根

李崇

楊公則

梁習

王慧龍

蕭恭

陸胤

蕭景

韋仁壽

徐敬業

厲文才

段秀實

盧弘宣

柳開

楊大異

周渭

裴懷古

秦再雄

牧津卷之三

消弭上

明山陰祁承燾

龔遂

龔遂爲渤海太守時歲饑盜賊羣起宣帝召見
謂遂曰渤海擾亂朕甚憂之何以息其盜賊對
曰海瀕遐遠不沾聖化其民困於饑寒而吏不
恤故使陛下赤子盜弄陛下之兵於潢池中耳
今欲使臣勝之耶將安之也上曰選用賢良固
將安之遂曰治亂民猶治亂繩不可急也惟緩

之然後可治。臣願丞相御史無拘臣以文法，得一切便宜從事，上許焉。遂乘傳至渤海界，郡聞新太守至，發兵以迎。遂皆遣還，移書敕屬縣悉罷逐盜賊吏，諸持鋤鉤田器者皆爲良民，吏無得問。持兵者乃爲盜賊，遂單車獨行至府，郡中翕然盜賊聞遂教令，卽時解散。

治亂民固如治亂繩，而御劣民更如御劣馬，急轡促駕，馬之逸也，其有已時乎。渤海之政，始終持一安字爲主，而作用在緩此。

造父調良之法也。○果欲爲盜賊者，不
持兵器與農器之間，遂特示之以意，留此
一着爲解散地耳。

賈琮

賈琮舉孝廉，歷官爲京兆令，有政理。先是交趾
土多珍產，明璣翠羽，犀象瑇瑁，異香美木之屬，
莫不自出。前後刺史率多無清行，上承權貴，下
積私賂，財計盈給，輒復求免遷代，故吏民怨叛。
中平元年，交趾反，執刺史及合浦太守，自

稱柱天將軍、靈帝特敕三府、精選能吏、有司舉
琮爲交趾刺史、琮到部、訊其反狀、咸言賦斂過
重、百姓莫不空單、京師遙遠、告寃無所、民不聊
生、自活、故聚爲盜賊、琮卽移書告示、各使安其
資業、招撫亂散、蠲復徭役、誅斬渠帥爲大害者、有○此○首○方○可○言○招○
簡選良吏、試守諸縣、歲間蕩定、百姓以安、巷路
爲之歌曰、賈父來晚、使我先反、今見清平、吏不
敢侵、在事三年、爲十三州最、徵拜議郎、尋以爲
冀州刺史、舊典傳車駟駕、垂赤帷裳、迎於州界

及琮之部、升車言曰、刺史嘗遠視廣聽、糾察美惡、何有反垂帷裳以自掩塞乎、命御者褰之、百城聞風、自然竦震、其諸臈過者、望風解印綬去、於是州界翕然、

賈孟堅受命荒微、惟一意爲撫綏安養之事、而詰盜戢奸、已在其中、持危定亂、固無異術也、至謂遠視廣聽、大得刺史之體、

种嵩

种嵩出爲益州刺史、嵩素慷慨、好立功立事、在

職三年、宣恩遠夷、開曉殊俗、岷山雜落、皆懷服漢德、其白狼槃木唐敢、叩焚諸國、自前刺史朱輔卒後、遂絕、嵩至、乃復向化、時永昌太守冶鑄黃金爲文蛇、以獻梁冀、嵩糾發逮捕、馳傳上言、而二府畏懦、不敢案之、冀由是銜怒於嵩、會巴郡人服直、聚黨百餘人、自稱天王、嵩與太守應承討捕、不克、吏人多被傷害、冀因此陷之、傳逮嵩、承、太尉李固上疏救之、梁太后省奏、乃赦嵩、免官而已、後梁州羌動、以嵩爲梁州刺史、

甚得百姓歡心、被徵當遷、吏人詣闕請留之、太
后歎曰、未聞刺史得人心若是、乃許之、嵩復留
一年、遷漢陽太守、戎夷男女送至漢陽界、嵩與
相揖謝、千里不得乘車、及到郡、化行羌胡、禁止
侵掠、遷使匈奴中郎將、時遼東烏桓反、復轉
遼東太守、烏桓望風率服、迎拜於界上、

种嵩潛布恩威、使蠻貊革心而向化、此真
戢亂弭暴、造福一方、若其發永昌太守金
蛇之嬪、尤見風裁、

伏湛

伏湛以父任爲博士弟子、更始立、以爲平原太守、時倉卒兵起、天下驚擾、而湛獨晏然、教授不廢、謂妻子曰、夫一穀不登、國君徹膳、今民皆饑、奈何獨飽、乃共食粗糲、悉分俸祿以賑鄉里來客者百餘家、時門下督謀欲爲湛起兵、湛惡其惑衆、卽收斬之、徇首城郭、以示百姓、於是吏人信向、郡內以安、平原一境、湛所全也。

湛本廉吏、至立斬惑衆之門下督、可謂具

體用才

祭彤

祭彤、遵之從弟、早孤、以孝見稱、遇天下亂、野無
烟火、而獨在冢側、賊過、見其尚幼、皆奇而哀之。
光武初、以遵故、拜彤爲黃門侍郎、及遵卒、無子。
帝追傷之、以彤爲偃師長、令近遵墳墓。彤有權
畧、視事五歲、縣無盜、璽書勉勵、增秩一等。建武
十七年、拜遼東太守。彤有勇力、能貫三百斤弓。
鮮于萬餘騎寇遼東、彤率數千人逆擊之、自陷。

陳虜大奔、投水死者過半、自是鮮卑不敢闕塞、
彤以匈奴鮮卑及赤山烏桓三虜連和、卒爲邊
害、乃使招鮮卑、示以財利、其後偏何邑落諸豪
並歸義、願自效、彤曰、審欲立功、當擊匈奴、斬送
頭首、乃可信耳、偏何等卽擊匈奴、斬首二千餘
持頭詣郡、其後歲歲相攻、自是匈奴衰弱、邊無
寇警、鮮卑烏桓並入朝貢、乃悉罷緣邊屯兵、十
二年、徵爲太僕、彤在遼東三十年、衣無兼副、顯
宗嘉其功、又美彤清約、賜錢百萬、馬三匹、衣被

刀劍下至居室什物大小無不悉被帝每歎息以爲可屬以重任

祭次孫智勇超人律已乃至衣無兼副如此廉將安得不立功邈陞後爲左賢王所誑坐逗留下獄臨終猶戒其子悉簿上所賜物卓哉志行可風債帥矣

田豫

田豫初從豫州刺史劉備以母老求歸遼東太守公孫瓚使豫守東川令瓚敗鮮于輔行太守

事素善豫，以爲長史。豫因勸輔歸命曹氏司空操，召豫爲丞相軍謀掾，除潁陰朗陵令，歷遷弋陽太守。所在有治聲。鄢陵侯彰征代郡，以豫爲相，軍次易北，虜伏騎擊之，軍人擾亂，莫知所爲。豫因地形，回車結圓陳，弓弩持滿於內，胡不能進，散去。追擊，大破之。遂平代，遷南陽太守。先時郡人侯音反，衆數千人，前太守捕繫音黨與五百餘人。豫至，悉見諸囚，慰諭開其自新之路。一時破械遣之，諸囚皆叩頭願自效，卽相告語羣。

賊一朝解散。郡內清淨。文帝初。北狄彊盛。乃使
豫持節護烏桓校尉。豫以戎狄爲一。非中國之
利。乃先構離之。使自爲讐敵。互相攻伐。因而救
善。討惡。以示恩信。胡人破膽。威振沙漠。凡逋亡
姦宄。爲胡作計。不利官者。豫皆構刺。攪離。使凶
邪之謀不遂。而幽州刺史王雄支黨毀。豫亂邊
生事。遂轉豫爲汝南太守。

因地形回車結陣。甚得兵家因地之意。破
械遣囚。遂至羣賊解散。其威信已孚。又何

以構離使爲讐敵前後自相矛盾耶然救
善討惡自足示虜恩信

裴潛

裴潛爲代郡太守烏桓王及其大人各稱單于
專制郡事前太守莫能治曹操欲授潛精兵以
鎮討之潛曰代郡戶口殷衆士馬控弦動有萬
數單于自知放橫日久內不自安今多將兵往
必懼而拒境少將則不見憚宜以計圖之不可
以兵威迫也遂單車之郡撫之以靜單于以下

脫帽稽顙、悉還前後所署、漢書、單于表裏者十餘人、北邊大震、

按誅單于表裏者、乃足懾其魄、非徒外示鎮靜而已、

鄭渾

鄭渾遷下蔡長、邵陵令、天下未定、民皆剽輕、不念產殖、渾所在、奪其漁獵之具、課使耕桑、後稍豐給、遷左馮翊、時梁興等畧吏民五千餘家、爲寇鈔、諸縣不禦、皆恐懼、寄治郡下、議者悉以爲

當移就險。渾曰：興等破散，竄在山阻，雖有隨者，率脅從耳。今當廣開降路，宣諭恩信，而保險自守。此示弱也。乃聚斂吏民，治城郭，爲守禦之備。遂發民逐賊，明賞罰，與要誓，其所得獲，一以充賞。百姓大悅，皆願捕賊。賊之失妻子者，皆還求降。渾責其得他婦女，然後還其妻子。於是轉相寇盜，黨與離散。渾率吏民斬興及其支黨，又賊靳富等脅將夏陽長邵陵令，并吏民入磴山。渾復討擊，破富等，獲二縣長吏，將其所畧還。及趙

青龍者殺左內史程休、渾遣壯士就梟其首、前
後歸附四千餘家、由是山賊皆平、民安產業、轉
爲上黨太守、魏王操征漢中、以渾爲京兆尹、民
安於農、盜賊止息、及大軍入漢中、運轉軍糧爲
最、魏王操益嘉之、文帝卽位、遷陽平、沛陽二太
守、與陂遏開稻田、租入倍常、民賴其利、號曰鄭
陂、轉爲山陽魏郡太守、其治倣此、又以郡苦乏
材木、乃課樹榆爲籬、益樹五果、入魏郡界、村落
整齊如一、民得財足用饒、帝聞之、下詔稱述、告

布天下

鄭渾有定變制亂之畧而兩爲郡守惟循
循樹藝灌溉之是務安內以爲攘外是真
消弭

鄧艾

陽城太守鄧艾上言單于在內羌夷失統合散
無主今單于之尊自疏而外土之威日重則胡
虜不可不深備也聞劉豹部有叛胡可因叛割
爲二國以分其勢去卑功顯前朝而子不繼業

宜加其子顯號、使居雁門、離國弱寇、追錄舊勲、此御邊長計也、又陳羌胡與民同處者、宜以漸出之、使居民表以崇廉耻之教、塞姦宄之路、司馬師皆從之、

剖分叛胡之勢、漸出同處之民、艾之所見甚遠、然終不能杜五胡之亂、華、人謀定有未盡、不可盡委之氣運、○華夷不同風、宇宙之所以分內外也、未有夷狄叢聚而不釀無窮之禍者、晉之君臣、夢夢固不足言

然後世習旦夕之苟安而不爲深遠慮者
令人扼腕

沈璞

盱眙太守沈璞到官王玄謨猶在滑臺江淮無
警璞以郡當衝要乃繕城浚隍積財穀儲矢石
爲城守之備僚屬皆非之朝廷亦以爲過及魏
兵南向守宰多棄城走或勸璞宜還建康璞曰
虜若以城小不顧夫復何懼若肉薄來攻此乃
吾報國之秋諸君封侯之日奈何去之諸君嘗

見數十萬人聚於小城之下而不敗者乎。昆陽合肥前事之明驗也。衆心稍定。璞收集得二千精兵。曰足矣。及臧質向城。衆謂璞曰。虜若不攻城。則無所事。衆若其攻城。則城中止可容見力耳。地狹人多。鮮不爲患。且敵衆我寡。人所共知。若以質衆能退敵。完城則全功不在我。若避罪歸都。會質舟楫。必更相蹂踐。正足爲患。不若閉門勿受。璞歎曰。虜必不能登城。敢爲諸君保之。舟楫之計。固已久息。虜之殘害。古今未有。屠剝

之○苦○衆○所○共○見○其○中○幸○者○不○過○驅○還○北○國○作○奴○
婢○耳○彼○雖○烏○合○寧○不○憚○此○邪○所○謂○同○舟○而○濟○胡○
越○一○心○者○也○今○兵○多○則○虜○退○速○少○則○退○緩○吾○寧○
可○欲○專○功○而○留○虜○乎○乃○開○門○納○質○質○見○城○中○豐○
實○大○喜○衆○皆○稱○萬○歲○因○與○璞○共○守○魏○人○聞○盱○眙○
有○積○粟○一○攻○不○拔○卽○留○數○千○人○守○之○自○帥○大○衆○
南○向○由○是○盱○眙○得○益○完○守○備○明○年○魏○主○還○攻○盱○
眙○不○克○

聚數十萬人於城下未有不敗此古今之

定理然狂寇臨城曾不能爲須臾之守何見事憤憤若此視盱眙太守古今人真不相及矣

馮道根

南梁太守馮道根戍阜陵初到修城隍遠斥堠如敵將至衆頗笑之道根曰怯防勇戰此之謂也城未畢魏党法宗等衆二萬奄至城下衆皆失色道根命大開門緩服登城選精銳二百人出與魏兵戰破之魏人見其意思開暇戰又不

利遂引去。道根將百騎擊高祖珍，破之。魏軍糧運絕，引退。以道根爲豫州刺史。

敵未至而兢兢若將至，敵至自然應之以暇，非欲借此示敵也。

李崇

李崇，孝文初爲荊州刺史，鎮上洛，敕發秦、陝二州兵送之。崇辭曰：「邊人失和，本怨刺史，奉詔代之，但一宣詔旨而已，不須發兵自防，使人懷懼也。」乃只將數十騎馳到上洛，宣詔綏慰，邊戍晏

得齊人悉令遣還南人感悅兩境交和。在州四年甚有稱績。召還除兗州刺史。兗多劫盜崇乃村置一樓樓懸一鼓盜發之處雙槓擊鼓四面諸村聞鼓齊擊咸於要路俄頃聲布百里其中險要悉有伏兵故盜竊始發便爾擒送諸州置樓懸鼓自崇始也。延昌初都督江西諸路事先是壽春縣人荀泰有子三歲遇賊亡失後見在同縣趙奉伯家。二家各言已子並有鄰證郡縣不能斷崇令二父與兒各禁別處經數旬乃告

之曰、君兒昨不幸遇疾暴死了也、苟泰聞之、悲號不自勝、奉伯但嗟咨而已、崇遂以兒還泰、奉伯乃款引、又定州流人解慶賓、兄弟坐事徙揚州、弟思安背役亡歸、慶賓欲規絕名貫、乃認城外死尸、詐稱其弟爲軍兵李益等所殺、有女巫楊氏自誣云、見鬼稱說思安被害甚苦、崇疑之、密遣二人非州內所識者、僞從外來、詣慶賓告曰、僕在北門比有一人、見過寄宿、夜中共語、疑其有異、便卽詰問、乃云是流兵背役解某、我兄

慶賓見住揚州相國城內脫矜慙爲我往告我
兄必重相謝且勿送官也慶賓見說悵然失色
故求少停此人具報崇崇一鞠卽伏時霖雨十
三日大水入城崇與兵泊城中而水增未已崇
乃乘船附女牆州府勸崇棄州保北山崇曰淮
南萬里繫於吾身一旦動脚百姓瓦解揚州之
地恐非國物昔王尊慷慨義感黃河吾豈愛一
軀哉但憐士庶無辜同死可桴筏隨高人規自
脫吾必死守此城時州人裴綸等受梁假豫州

刺史因乘大水謀欲爲亂崇皆擊滅之是時非
崇則淮南不守矣崇沈深有將畧在州凡十年
嘗養壯士數千人寇賊侵邊所向摧破號曰臥
虎

沈深二字足盡崇一生謀畧○置樓懸鼓
用以禦盜此法今當亟行

楊公則

楊公則和帝時授湘州刺史武帝軍次沔命公
則率湘府之衆會於夏口時荊州諸軍悉受公

則節度、雖蕭穎達宗室之貴、亦教焉、鄧城、二
帝命諸軍即日俱下、公則受命先驅、徑掩衆桑
江州既定、連旌東下、直造京邑、公則號令嚴明、
秋毫不犯、所在莫不賴焉、大軍至新林、公則自
越城、移屯領軍府壘、北樓與南掖門相對、嘗登
樓望戰、城中遙見麾蓋、縱神鋒弩射之、矢貫胡
牀、左右皆失色、公則曰、虜幾中吾脚、談笑如初
東昏夜選勇士攻公、則柵軍中驚擾、公則堅臥
不起、徐命擊之、東昏軍乃退、公則所領多是湘

漢人性怯懦，城內輕之，以爲易與。每出盪戰，輒先犯公。則壘，公則獎勵軍士，克敵爲多。及城平，城內出者，或被剝奪，公則引率麾下，列陣東掖門，衛送公。鄉士庶故出者，多由公，則營焉。初，公則東下州部，諸郡多未賓從。及公則還州，然後諸屯聚並散。公則爲政，雖無威嚴，然守已廉慎，爲吏民所悅。湘俗，單門多以賂求州職，公則乃悉斷之。所辟引，皆州郡著姓。武帝班下諸州，以爲法則。

號令嚴明、秋毫無犯者、戰則勝、攻則取、無事不濟、

梁習

梁習爲郡綱紀、太祖爲司空、辟召爲漳長、累轉侯氏海西下邳令、所在有治聲、還爲西曹令史、遷爲屬、并土新附、習以別部司馬領并州刺史、時承高幹荒亂之餘、胡狄在界、張雄跋扈、吏民亡叛、入其部落、兵家擁衆、作爲寇害、更相扇動、往往碁時、習到官、誘喻招納、皆禮召其豪右、稍

牧津

卷三

六

稍薦舉、使詣幕府、豪右已盡、乃次發諸丁彊、以

爲義從、又因大軍出征、分清以爲勇力、吏兵已

去之後、此音近刻稍移其家、前後送鄴、凡數萬口、其不從

命者、興兵致討、斬首千數、降附者萬計、單于恭

順、名王稽顙、部曲服事、供職同於編戶、邊境肅

清、百姓布野、勤勸農桑、令行禁止、貢達名士、咸

顯於世、太祖嘉之、賜爵關內侯、更拜爲真、長老

稱詠、以爲自所聞識、刺史未有及習者、建安十

八年、州屬冀、更拜習西部都督從事、統屬冀州

時方使人于上黨取六材供鄴宮室習表置屯
田都尉二人各領六百夫於道次耕種菽粟以
給人牛之費後單于入侍西北無虞習之績也
首召其豪次發諸丁一境之人皆爲我用
不除盜而盜自無若其置屯田以給人牛
之費今運餉陸輓之地亟當倣行

王慧龍

王慧龍爲滎陽太守慧龍在郡十年農戰並修
大著聲績歸附者萬餘家宋主縱反問於魏云

慧龍自以功高位下、欲引宋人入寇、因執司馬
楚之以叛、魏主聞之、賜慧龍璽書曰、劉義隆畏
將軍如虎、欲相中害、朕自知之、風塵之言、想不
足介意、宋主復遣刺客呂玄伯刺之、曰得慧龍
首、封二百戶男、賞絹千疋、玄伯詐爲降人、求屏
人有所論、慧龍疑之、使人探其懷、得尺刃、玄伯
叩頭請死、慧龍曰、各爲其主耳、釋之、左右諫曰
宋人爲謀未已、不殺玄伯、無以制將來、慧龍曰
死生有命、彼亦安能害我、我以仁義爲扞蔽、又

何憂乎、遂捨之。

慧龍以仁義爲扞蔽、似以鄉飲酒之禮、理軍市、其言近迂、然農戰並修、綱繆有地、

蕭恭

衡州刺史武會超在州、子弟縱暴、州人朱朗聚黨反、武帝以蕭恭爲刺史、時朗已圍始興、恭至、緩服徇賊、示以恩信、賊服其勇、是夜還三舍、以避軍吏、請追恭曰、賊以政苛致叛、非有陳吳之心、緩之則自潰、急之則併力、諸君置之、明日朗

遣使請降、

只於緩急二字籌賊、大有遠識、如此不煩誅戮、乃真消弭、

陸胤

陸胤爲交州刺史、安南校尉、時交趾九真夷賊、攻歿城邑、交部騷動、胤入南界、喻以恩信、務崇招納、高涼渠帥黃吳等、支黨三千餘家、皆出降、引軍而南、重宣至誠、遣以財幣、賊帥百餘人、民五萬餘家、幽深不羈、莫不稽顙、交域清泰、就加

安南將軍、復討蒼梧建陵賊、破之。永安元年、徵
爲西陵督、封都亭侯。後轉左虎林、中書丞。華覈
表胤曰：胤銜命在州、十有餘年、實帶殊俗、寶玩
所生、而內無粉黛附珠之妾、家無文甲犀象之
珍、方之今臣、實難多得。宜在輦轂、股肱王室、
撫綏惟有安靜不擾一法。然必上藥則下
安。

蕭景

蕭景爲寧蠻校尉、荊州刺史。元志攻潺溝、驅迫

羣蠻羣蠻悉渡漢水來降、議者以爲蠻累爲邊
患、可因此除之、景曰、窮來歸我、誅之不祥、且魏
人來侵、每爲矛盾、若悉誅蠻、則魏軍無礙、非長
策也、乃開樊城受降、因命司馬朱思遠、寧蠻長
史曹義宗、中兵參軍孟惠雋、擊志於潺溝、大破
之、景初到州、省除出迎羽儀器具、不得煩擾吏
民、修葺城壘、申警邊備、理詞訟、觀農桑、郡縣皆
改節自勵、州內清靜、抄盜絕迹、

能使郡縣皆改節自勵、何盜不絕、

韋仁壽

韋仁壽大業末爲蜀郡司法書佐斷獄平得罪者皆自以韋君所論死無恨高祖入關遣使者徇定蜀承制擢仁壽都督府長史南寧州納款朝廷歲遣使撫接至率貪沓邊人苦之多畔去帝素聞仁壽治道詔檢教南寧州寄治起崗詔歲一按行慰勞仁壽將兵五百人循西洱河開地數千里稱詔置七州十五縣酋豪皆來賓見卽授以牧宰威令簡嚴人人安悅將還酋長泣

曰天子藉公鎮撫、奈何欲去我、仁壽以池壁、未立爲解、諸酋卽相率築城起廨、甫旬畧具、仁壽乃告以實曰、吾奉詔第撫循、庸敢擅留、夷夏父老、乃悲啼祖行、遣子弟隨貢方物、天子大悅、開地數千里、置七州十五縣、如此勲績、能使蠻酋不以畏而以懷、超人一等、

徐敬業

高宗時、蠻羣聚爲寇、討之輒不利、乃以徐敬業爲刺史、彼州發卒郊迎、敬業盡放令還、單騎至

府賊聞新刺史至，皆繕理以待。敬業一無所聞，處分他事畢，方曰：「賊皆安在？」曰：「在南岸。」乃從一二佐吏而往，觀者莫不駭愕。賊初持兵覘望，及見船中無所有，乃更閉營藏隱。敬業直入其營內，告云：「國家知汝等爲貪吏所苦，非有他惡，可悉歸田。後去者爲賊，惟召其魁首，責以不早降。各杖數十而遣之。」境內肅然。其祖英公聞之，壯其膽畧，曰：「吾不辦此，然破我家者，必此兒也。」

敬業膽畧，自是不凡，然亦是先聲足以奪

牧津

清江上

卷三

主

人但英公逆知其必破家何也

厲文才

厲文才貞觀初爲道州刺史是時南土未靜荔
蒲之寇猖獗屠斫人民焚燒城邑一方震動文
才臨郡朞月設奇禽斬羣盜悉平威愛被於遠
邇改容州刺史客人聞之鼓舞歡呼曰厲道州
來吾屬得恃矣文才下車悉心撫字不朞年而
生色赫衣革心無夜吠犬民皆稱之曰厲

盜平民化皆不出朞月間厲父之稱名與實副

段秀實

段秀實以白孝德薦爲涇州刺史時郭子儀爲副元帥居蒲子晞以檢校尚書領行營節度使屯邠州邠人之嗜惡者竄名伍中因白晝羣行顏頡於市有不嫌輒擊傷市人椎釜鬲竄盜於道甚至撞害孕婦孝德不敢言秀實自州至府白狀曰天子以生人付公公見人被害怡然不

爲意其如大亂何。孝德曰：願奉教。秀實自請曰：公誠以某爲都虞候，某能爲公已之。孝德卽檄署付軍。俄而晞士十七人入市取酒，刺殺酒翁，壞釀器，秀實列卒取之，斷首置槊上，植示門外。一管大譟，盡甲。秀實徐解佩刀，選老嫗一人持馬徑至晞門下。甲者皆出，秀實笑而入，曰：殺一老兵，何甲也。吾戴吾頭來矣。甲者愕然。秀實因曉諭之曰：尚書負若屬耶？副元帥負若屬耶？奈何欲以亂敗郭氏？俄而晞出，秀實又曰：副元帥

功塞天地、今尚書恣卒爲暴、使亂天子邊、欲誑
歸罪乎、罪及副元帥矣、今邠惡子弟、以貨竄名
籍中、殺害人藉藉如是、人皆曰尚書以副元帥
故、不戢士、然則郭氏功名、其與存者有幾、晞乃
載拜曰、公幸教晞、卽叱左右解甲、秀實曰、吾未
哺食、請爲我設具、已食、又曰、吾疾作、願一宿門
下、遂臥軍中、晞大駭、戒候卒擊柝衛之、明日晞
與俱至、孝德所陳謝、邠賴以安、秀實之力、
令公勛名蓋世、卽最驕悍之子、必不忍以

家聲墮地、故秀實之言、得乘機而入、然咄
嗟談笑之間、初若披示之以心腹、旣而玩
弄之于股掌、真大豪傑操縱手、

盧弘宣

盧弘宣遷京兆尹、時歲饑、盜贅結酋豪自王、僞
署官吏、發敖廩、招亡命、聯蓬瀛、嘉榮諸州、詠蠻
落搖亂、根株盤熾、弘宣下檄脅諭賊黨、稍降其
罪、弘宣者置軍中、孱無能還之農、魁長逃入峽、
吏捕誅之、徙義武節度使、弘宣性寬厚、

省人便安之。然犯者不誣貸。河朔政法偶語軍中則死。弘宣始除之。初詔賜其軍粟三十萬斛。貯飛狐。弘宣計輓費不能滿直。敕吏守之。明年春大旱。教民隨力往取。時幽魏饑甚。獨易定自如。至秋悉收所貸軍食以饒。

政目簡省。是寬厚人。而遇事更饒才局。

柳開

柳開選知常州。至則遣人招諭羣盜。設計擒之。賊懼。悉來歸。因出私錢爲賞。解衣賜賊帥。置之。

左右或曰寇不可近開曰彼失所則盜得其所乃我民也始懼死而親愛之出其望也以赤心感之彼必盡歸我矣不半歲境內悉寧命知環州是州與吐蕃接境州人與蕃中貿易悉自制衡量增減其直以與之或戎人有訟官司又不之理以故戎境多怨開至一其價直民欺戎人者罪之部落翕然歸向未幾移邠州時調民輦送趣環慶歲已再運民皆蕩析產業而轉運使復督後運民數千人詣州號訴且曰力不逮願

元矣、開亟貽書轉運使曰、開近離環州、知
○惟○知○兵○餉○可○支○四○年○故○可○罷○軍○運○之
計不增、大兵可支四年、今蠶農方作、再運半
○然○如○誤○軍○與○何
老幼疲弊、畜乘困竭、奈何又苦之、如不罷、開
即馳詣闕下、白於上前矣、卒罷之、

只是一意撫綏、不知遺地方多少和平之
福、

楊大異

楊大異爲移遠尉、有峒寇擾民、致討積年弗獲、
檄大異往治、大異以一僕負告身自隨、肩輿詣

賊峒傳呼尉至、賊露刃成列以待、徐諭以禍福、皆伏地叩頭、願改過自新、卽留告身爲質、偕其渠魁數輩出降。

告身便足信乎、要其感化者、定自有法。

周渭

周渭解褐爲白馬主簿、縣大吏犯法、渭卽斬之、上奇其才、擢右贊善大夫、時魏帥符彥卿專恣、朝議選常參官強幹者蒞其屬邑、以渭知永濟、彥卿郊迎、渭揖于馬上、就館始與相見、畧不

降屈示以朝廷之威重。縣有盜傷人而逸。渭捕獲并暴慶匿者按誅之。不以送府。乾德中。通判興州。州領且口砦。多戍兵。益軍數。縱其下爲暴。居人苦之。渭馳往。諭以禍福。斬其軍校衆皆懾服。詔書嘉獎。命兼本砦鈐轄。開寶元年。鳳州經治主吏盜隱官銀。擇渭往代。周歲羨課數。仁賜緡魚。又還知棣州。殿直傅延翰爲監軍。謀作亂。走契丹。爲部下所告。渭擒之以聞。命械至闕下。鞫得實。斬於西市。

抑橫帥、誅匿盜、斬暴兵、無不弭耳帖心、豈徒一強悍吏可襲取哉、必事當其機、威信其法、風行雷動、乃得如此、

裴懷古

裴懷古以上書補下邳主簿、遷監察御史、姚萇道蠻反、命懷古馳驛往懷輯之、申明誅賞、歸者日千計、俄縛酋首、遂定南方蠻、立石著功、姚萇酋等叩闕下、願得懷古鎮安遠夷、拜姚州都督、以疾辭、始安賊歐陽倩衆數萬、剽沒州縣、以懷

古爲桂州都督招尉討擊使未踰嶺逆以書諭禍福賊迎降自陳爲吏侵而反懷古知其誠以爲示不疑可破其謀乃輕騎赴之或曰獠夷難親儒之且不信況易之哉答曰忠信可通神明況裔人邪身至壁撫諭倩等大喜悉歸所掠出降單諸洞素翻覆者亦牽連根附嶺外平徙相州刺史并州大都督長史所至吏民懷愛神龍中召爲左羽林大將軍未至官還爲并州人知其還携扶老稚出迎崔宜道始代爲長史亦野

次懷古不欲厚懷宜道使人驅迎者還而來者愈衆得人心類如此會以左威衛大將軍召孫佺代之佺不知兵遂敗懷古清介審慎在幽州時監軍韓琬稱其馭士信臨財廉爲國名將忠信可行蠻貊人情自不相遠扶老携幼之迎豈易致哉馭士信臨財廉所由來遠矣

秦再雄

宋太祖時以秦再雄爲辰州刺史再雄本僑人

長七尺、武健多謀、在周行逢時、屢以戰鬪立功、蠻黨服之、時武陵、辰陽、澧陽、清湘、邵陽、五州各有蠻獠保聚、依山阻江、迨十餘萬、數出寇邊、以致圍逼、辰永二州殺掠民畜、歲歲不寧、太祖旣下荆湖、思得通蠻情、習險扼、而勇智可任者、以鎮撫之、聞再雄名、召至闕下、察知可用、因以一路之事付之、卽除爲辰州刺史、官其一子爲殿直、賜予甚厚、仍使自辟吏屬、盡予一州租賦、再雄感繫異恩、誓死報效、至州日、訓練土兵得三

千人皆披甲渡水、歷山飛壑、捷如猿猱、又選親
校二十人、分使諸蠻、以傳朝廷懷徕之意、莫不
從風而靡、各得降表以聞、太祖大喜、再召至闕、
面加獎激、再雄伏地流涕、嗚咽不勝、改辰州團
練使、又以其門客王允成爲本州推官、再雄盡
瘁邊圉、故終太祖世、無蠻貊之患、五州連袞數
千里、不增一兵、不費帑庾、而邊境安安、由駕馭
再雄之力也、

蠻夷中、如再雄之才畧者、豈繁無人、然能

以一州租稅盡予之、而且聽其辟吏屬者
乎、如此駕馭、安得不得人死力、今黔滇之
流毒酷矣、草澤英雄、似不可無此鼓舞法、
○再雄一獠種、便能爲國家作萬里長城、
便可與狄襄武相頡頏、余特錄此、以見蠻
夷、寧未嘗無人、惟在上之所拔識耳、

牧津卷之三

終